

Louis Pascau

Tazio Carlevaro

Unesma aparo en 1981

Nova edito: 2019

Modern Ido-Poeti

Editerio "Hans Dubois"

CH-6500 Bellinzona

Libro originale preparita por Ido-publiko

Autori: Louis Pascau, Tazio Carlevaro.

Kopio-yuro: che l' autori.

Editerio: "Hans Dubois", che Tazio Carlevaro, Viale Giuseppe Motta 32, CH-6500
BELLINZONA (Suisia)
tcarlevaro@bluewin.ch

Atencez

Ja en 1981 ni probis kontaktar omn autori, por querer la permiso riproduktar la texti quin ni previdis por ca libreto. Tamen, ne omnin ni sucesis kontaktar. Ni pregas eventual ne-kontaktiti, skribar al hodial redaktero di ca nov edituro.

Dato dil unesma edito: decembro 1981

Dato dil duesma edito: marto 2019

Kontenajo dil libro

Kontenajo dil libro.....	3
Kom prefaco.....	4
Andreas Juste	5
Hans Brismark.....	11
Kozi Sato.....	12
Boris Aaronov.....	16
Mirosław Więchowski ("VEX").....	17
Nikolay Gaponenko	21
Michel Bouts.....	25
Valdis Sprogis	28
Ausma Pormale.....	33
Axel Rylander.....	37
Heidi Neussner.....	38
Louis Pascau ("Lui Pasko").....	39
Komentaro (1980)	43
Komentaro (2019)	46

Kom prefaco

Amiki, qua temeraro pretendus definar poezio ?

Ol esas nedefinebla, ol es diversa infinite. Sive rezono, sive senti, sive sentimenti, sive fantazio, sive foleso konfidas su a la Muzi. Ula poeto paktas kun Apolon; altra, kun Dionizos. Polimnia exaltas Paulus, Erato karezas Petrus. Unu parfinas versi quale sorgem orforjisto, altru gamboligas libere la vorti quale kavalyuni en agro. Hike, vi admiras flori; ibe, anmo montras su. Ta poemo fluas limpide, olca misterioze velizesas. Furio, gracio, amo, odio, prego, malico, laudo, gayeso, tristeso, deziro, sajeso... tota homo interesas poezio. Ol aptesas salvar homaro de *robotesko. Ni oportune divinez ta chanco poeziala ! Ni acptez tam la formi stranja kam la familiara formi ! Nula linguo interdiktetas a la poeti. Nula linguo plu bezonas poezio, kom homal expresuro, kam linguo internaciona, qua ambicias interkorespondigor la populi.

Yen do ca modesta kolekturo. Ol unionas l' Oriento kun l' Ocidento. Hike, koncernesas nur recenta verki pruvanta ke ldo ankore vivadas. Antea poemi aparis od aparos en la tritoma Antologio da Andreas Juste, de olqua ja du tomi editesis.

Utinam singlu trovez, hodie, en ca pagini, ula plezuro, e mem, esperinde, ulo plusa !...

Lui Pasko

Andreas Juste

« Kelka noti por mea propra biografio ? Ho ve ! ka tu ne lektis la naraco pri Peter Schlemihl, qua havis nul ombro ? Quaze simile me havas nul biografio. Nul vojago, nul milito, nul partiso, nul funkcio, nul ordeno, nul aventuro.

«E tamen me vivas !

«On povas nur asertar, ke me naskis en yaro 1918, baptisis Andreas, e ke Juste esas la nomo di mea gento. Pluse anke, ke me laboras kom advokato, maxim ofte por povra homi, ed ipsa pasable povra.

«Ultre lo nur fluado di movanta pensi e kompozado di multa verki. De sur la marjino, de exter, me spektas la sociala texto: ibe nul plaso por me.

«Kande super la vicina parko flugas pigo, me salutas ta vivanta simbolo, nam en Nederlandana linguo lua nomo esas ya "De Ekster" (en olima skribo: "de exter").

Tamen me ne obliviez ta bela jorno en Ticino en yaro 1971, kand on salutis me kom poeto-laureato. Pro kanto en Ido, pri Europa, ed en lando di ne-obliviiit ancestro. To esis 1'evento di mea vivo. »

L' argironeto

On dicas, ke l' Argironeto
(Tal esas ya la granda nomo,
Quan por ta mikra bestieto
Inventis olim granda homo)

Es araneo originala:
Lu povis ya trovar moyeno
Vivar en aquo riverala
Dum longa tempo sen ul jeno.

Aeron tamen lu bezonas
Por respirar, l' argironeto,
E por ta skopo lu fasonas
Per sua stilko mikra reto.

En ta saketo lu provizas,
Klozante sorge, bon aereo,
Ta baloneton ferme sizas
E brave plunjas en rivero.

Lu natas vers la profundajo
Por sua aventuroza turo
E lu nur havas kom bagajo
Ta diafana provizuro.

Nun la plunjeri imitas grave
Argironeto, ta maniero,
Li natas en la maro brave
Portante kompresit aero.

E ni poeti, ni qui prizas
La naturala splendideso,
En nia mento ni provizas
Kelka guteti de beleso:

Auroro , flori, pejzajo,
Serena versi, dolca kanti,
Tal es por ni lejer bagajo
Por la nostalgioz instanti.

Nubi

La nubi, quin la vento chasas
Prizentas magial spektaklo:

En blua cielo
Yen formi voluta;
Yen alta kastelo
Kun turmi akuta,
Ma drako minacas,
Qua supre flotacas.

Nun sua kapon il abasas
E shokas lente la pinaklo:

Disfalas la muri
E l' alta krenelo,
Ed ombra konturi
Dil bela kastelo,
E lua ruino
Divenas kolino.

La drako esas nun batelo
E granda segli esas l' ali.

E vice posterno

Facita belforma,
To esas kaverno,
Qua beas enorma,
Ed apud la klifo
Aparas nun rifo.

Ma fugas ja ta griz pelmelo,
E venas trupo de kavali:

Fantome li kuras
Sen irga bruiso,
E sempre li duras
Glitar ad abiso,
Qua semblas la skopo
Di sua galopo.

Desvolvas su nun omna-parte
Imensa sharpo de muslino.

Ma ka ne plus ventas ?
Ho, nova marvelo,
Quo subite eventas ?
En tota cielo
Sur blua gazoni
Pasturas mutoni.

Ho vento, tu desegnas arte
En nubi ed en imagino !

Por povra poeto
To semblas miraklo:
Kun sempra dileto
Lu juas spektaklo
E bel peizaji
Sen irga voyaji.

Sonjo-soni

Nu, qual esas ita soni ?
Kad es perli, qua disfal-
En kalico de kristal' ?

Quale stranj es ta resoni,
Ka la tinklo tre lontan
Di ul klosho porcelan ?

Ka liuto di princino
Expektanta sur la rivo
Di la maro dolc arivo ?

Ka ploranta violino
Expresanta quale voco
Lo profunda dil emoco ?

Ka bruiso di fonteno
Gorgeanta lor somero
Kun aromo di roziero ?

Ka la kanto di sireno,
Qua, natante cirkum roko
Lansas la luriv advoko ?

Ka la harpo di poeto,
Qua deplor- la nobla morto
Di Arthur la dolca forto ?

Ka la jemo dt profeto,
Qua lament en nokt' obskura,
Nam li vidas lo Futura ?

(Revado da pesimisto)

La semero

Tu ne savas, ho semero
Laboranta lor vespero,
Ka tu vidos la rekolto.
Tu parfinas, kun fervoro
Tua bel e bon laboro.

Ni l' Idisti, esas tala:
Sen diskuti shikanala,
Kun espero, kun plezuro,
Ni ya semas por futuro.

Soneto

Ho vi qui vivas for la trista turbi,
Milkapa monstri forta ma steril,
E for la richa sklavi qui defil-
Sur tro luxozza stradi di grand urbi,

Vi qui for la fumuri dil suburbi
Plenigas verko simpla ed util
Kun anmo klar e kordio humil
Sen suciar la tribual perturbi,

Vi qui ne perdis la naskala yuro
Sequar la nobla ritmo dil naturo,
Sen subisar la pekunial opreso,

Ho vi, l' ultimi forsan del mortivi
Qui juas tale homo-digna vivi,
Ka vi koncias via feliceso ?

(Yen mikra poemo cherpita de la serio "Petri an voyo", en japonatra formo)

De la palaco
Nur un kolono restas
En sola staco;
Ed ibe sur la kresto
Cikoniala nesto.

Olim e nun

Tri yarmili o quar ante nia epoko
Sur la stepo imensa kavalkis l' ancestri,
E sencese li migris de loko vers loko
Segun harda imperi di sua klan-estri.

Ho primavo barbar, misterioza nomado,
Me dezirus savar tua vivo e senti,
Pri tu ofte me rev- e per l'imaginado
Iluzionas vidar trans pasinta yarcenti.

Trairinte dum hori planaji e vali,
Por drlnkar nun li haltas an bordo di pondo;
Ita homi, qui povas dresar la kavali,
Ita viri potent es la mastri dil mondo.

Li anime diskutas, nam morge la bando
Must- iror trans imens ad obskura foresto;
Da la chefo luktema tal es la komando;
Por invado subit e por plusa konquesto.

Li feroce kombatos, li spolios trezoro,

E pos vinko rivenos kun trupo de sklavi,
Ili raptos sucino, plu bela kam oro,
Ed oclodos — pro quo ? pro la yuro dil glavi.

Poke chanjis la homi depos ta periodo:
Vice glavi de bronzo li uzas nun bombi;
Li ne chanjis la skopo, ma nur la metodo,
E Homaro tracizas la marchon per tombi.

Kad eventis sur tero, ho ve, nul progreso ?
Forsan, nam por agar lo feroc e lo mala,
Progresinte rapide pri hipokriteso,
Nun la homi deziras pretexti legala.

L' oficala decido da mala potenco,
Qua misduktas popolo vers fola destini,
To permissas a li kun la paco dil mento
Agar furti honest e legal asasini —

Ve, ho frati, sur ta lakrimoza planeto,
Ka nultempe audesos pacala melodio ?
Ka ni tandem komprenos ke nula dekreto,
Nula lego iustigas l' opresi e l' odio ?

Ka ni audos sen shamo la vorti olima
Di la yun Antigona, qua per sua klamo
A ni sempre advokas per moto sublima:
Ne per odio me naskis, me naskis por amo.

Hans Brismark

Hans Brismark, sveda mediko, honorala prezidero di Uniono por la Linguo Internaciona, mortis evanta 87 yari, en 1976. Il esis aktiva idisto, ed okazionale skribis anke poemi.

La matro mortinta

Tu foriris matro, ma pro quo ?
me questionis, kande la vespero venis,
e la silenco regnis en la chambro.
Nula manuo karezis mea vangis,
nula dolca voco dicis mea nomo.
Pro quo tu iris, matro ?
Ta esis tante bel e nobla,
tua kordio tante kompatema.
Quante ofte tu forprenis
mea doloroz lakrimi
e konsolacis mea kordio !
Tu foriris, matro !
Ka me ne itere vidis
la marveloza brilo dil okuli tua ?
Ka me nur en la memoro audis
tua simpatioz parolo ?
Ne plus me presis tua varma manui,
e ne plus me dicis, ke me amas tu ?
E me klamas: matro, matro !
Ka tu audas me ?
Nur la silenco esas la respondo,
e me ploras, ploras;
ma nulo konsolacas mea kordio.

Kozi Sato

Kozi Sato, japoniano, naskis en Tokyo (Japonia), yel auroro dil 5-a di mayo 1926; il docis angla linguo en alta skolo. Il diplomizesis pri ta linguo, e pri sociologio. De plu kam 3 yari il es profesoro che blindaro. Il praktikas la sistemo "Braille", e habitas en Nagasaki.

Kanto dil elektro-turmo

Rango de distanta agri ube nulo videsas... la trista,
sola grondo dil elektro-turmo !
En la nivanta cielo.
Tensante sua brakii, ol subisas forta, subita ventego
ed harda, alta batado di to quo kuras en olua korpo.
Ti qui regardas lu sola, servanta la fora, ne-dormanta
urbi, esas nur poeto e. kapricosa voyajanto.
Ye vespero dil monti ed agri di Aizu, kande la longa
ombri dil elektro-turmo ne plus videsas, mikra lumi lumeskas,
che la vilaji qui stacas shultro apud shultro.
Ho ! kara luni dil civilizeso, quin la farmisti regardas
tranquile.
(segun Koichi Mitani, en trad. da Kozi Sato)

"Haiki"

tradukita da Kozi Sato

Printempa maro
luladas e luladas...
muevo dormetas (segun Jitoku)

La pasereto
lud- en garden-angulo...
ne forirante (segun Koyo)

Printemp-vespere
venis invito-karto...
por teatrajo ! (segun Chinshino)

April-voyajo:
lente me trapazadas
lunoza nokto (segun Kochoku)

La vilajani exercas ye kavalo vespercenizo	(segun Kakiyamabushi)
Dika omleto ! Es vintrala vakanci... Matro... infanto...	(segun Sennyo)
Trans lilio-monto me ariv- al vilajo Flor-albizita	(segun Hekigo-do)
Per vesper-vento omna la blanka rozi movas e movas	(segun Shiki)
La dekorajo dil komprata kavalo: printempa vento	(segun Getsujo)
Matsushima ! tre bela Matsushima ! Matsushima !	(segun Basho)
Akompanante me ombro mea retrovenis. Tre bela luno !	(segun Sodo)
Esante lavita la tombo di mea infanto lun-lumizesas	(segun Toshino)
La klara luno ! Akordeono sonas en la batelo	(segun Rijin)
En la dometo dil monto-paseyo peonio – bela !	(segun Shuoshi Mizuahara Naiko)
Kantas kukulo. obliviita lumo dil monto-templo	(segun Gryokusetsin)

Printempo

Aden la busho
di februario
sonas torento

Printempa koldeso !
Princino Kaguyahimo
en la bambuo

El ne par-donas
Sua labii a me
kolda printempo !

Lumi dil templo
quaza printempo
venas vespero !

Somero

Tre kurta nokto !
Esas puerino
en puer-balneyo.

Autuno

Kolda autuno !
Sonadas la torento
Plue plue

Autuna vento !
La grandega vazo
tote sen flori.

Vintro

Sonadas kloshi
dil kristnasko-festo
lunoza nokto !

Kristnasko-festo !
Steli bele briladas
ek oriento.

Sacerdoto
polisas sua shui
por kristnasko-festo.

Boris Aaronov

Sovieta civitano, de Kiev, ube il ankore hodie habitas, Aaronov esas konocata en la tota idista mondo ja de 1927, lor il adheris al florifanta sovieta Ido-movmento. Il esis docisto profesionala: longe il docis anke Ido a pueri e a yuni di sua skolo. Il ne skribis multa poemi: generale, nur por okazioni specala.

Nia kansono

(dedikita a Renkontri amikala, Kiev, 1970)

Suno brilas gaya,
cielo sennuboza,
ni marchadas kune
joya, kurajoza !

Omni es amiki,
omni es egala,
nula enemiki –
union' fratala !

Kredas ni, ke venos
tempo expektanta
e popul omnube
esos parolanta

en Helpanta linguo,
linguo ideala
por ke sempre vivos
Union' mondala !

Hisez do plu alte
nia red standardo !
Brilez nia Stelo !
Flugez nia kanto !

Sonez Ido-voco
tra la mari, monti
por ke omni videz
klara horizonti !

Miroslaw Więchowski ("VEX")

Recente aparis sub pseudonimo "Vex", precipue en "Progreso", tre interesiva modernastila poemeti. L'autoro di ta poemeti naskis en Warszawa yel 29a di aprilo 1945. Il studiis en elementala skolo de 1952 til 1958, en gimnazio de 1958 til 1962, en alta skolo politeknikala di Warszawa de 1962 til 1969. De 1970 til 1976 il laboris kom asistanto en l' Instituto di Fundamenti di Elektroniko, ed en sama tempo il frequentis kursi pri matematiko e pedagogio an l' Universitato di Warszawa. De decembro 1976, il habitas en Uppsala (Suedia), ube il sucesoze studiis la komputorcienci, ed esas nun employata.

Papiliono

En sua palmeto
Mikra puerino klozis flava papiliono.
El turnesis
Aplaudis la manui
Amuzite kureskis renkontre me -
Kun la fingri flave makuloza del sango dil papiliono
Qua trovabis lojeyo e tombo
En elua palmo klozit...

Relato

Pro quo
lektante pri l' morto accidental
di un homo
ni kompatas
ni ploras
dum ke la morto di centmili
es por ni nulo plu
kam statistiko ?

Pro quo ?

Me skribas poemi poemachi versi versaji poeziaji poezifuri.
Nam, regretinde,
Oli ne savas skribar su ipsa.

Timo

Me timas polvo, psikologio e sociologi quin me lektas;
Me timas radioaktiveso ed LSD,
Automobili e fumuri,
Generali ed arboro-abatisti...
 E pose
Me oblivias e me aceptas ca risko
Sive me esperas, sive ol atraktas me;
 Anke tu lon facas
 Do pro quo tu ne kaptas tua kapo per la manui
 Kande jurnali anuncas venenizo di ankore un rivero ?

De ube savar

Se cirkum tu
Granda homi ne trovesas
E tamen granda kozi eventas
 Do lore TU es homo granda –

Ma qua kozi es grand e qua homi...

(sen titolo)

Lo nepercepteblan perceptar
Nomar
Klozar per vorto.

 Tu ne es omno - tu dicas -
 La folion falanta
 On ne riapartenigos a l' arboro.

Erero

Me volis dicar a lu
Ke lu ton ne facez.
Me savis...
Se lu ton facos...
 Me volis
 Ke lu ne facez erero facti olim da me.

Lu ne kredos
Lu facos to.
Nun lu volos dicar ton ad altru.

Me volas dicar a lu ke lu ton ne facez
E ne realigez mea next eroro...

Tu

Tu evas duadek yari -
Tua pektoro e hard
E la kapon tu fiere tenas sur la kolo,
Ube mem un rugeto ankore trovesar ne darfas.
Tu sentas tante superba koram l' oldini
Nam tu savas
Ke nultempe tu esos olda...

Tu evas triadek yari -
Tu ja savas ke pos atingar la zenito
On povas nur decensor.
Ma tu ankore kredas povar
Plulongigor la sejourno ibe,
Sub la maxlm lumozu sunradii,
Tante, quante tu volas...

E pose –
Tu savas nultempe riesor yuna
E tu regardas la fieru yunini
Sen envidiar li, indulgeme.
Tu ya savas anke
Ke li devos travivar ipsa
(nam es desposibla trovar remplasanto)
Lo sama quon experiencabis tu
Por klozar la cirklo eterna.

Nia domo I

Ulu kriblagis tra l' fingri
La tota tero
La omna astri
La omna kozi qui es --

Ulu facis la monti ek monti
E la vali ek vali –
Ulu lansis ideo
Ulu suportis ol –

La semanto omnipotenta ne vartis la rekolto
Il renuncis la mondo

La homi
La domo en qua saminstante
Es la viv', es la morto.

Nia domo II

Sur nia tero (ne tam granda kam ni volas)
Onyonatre ronda
La homuli esadas fatigata
La homini doloroze parturas la homidi
La homi eterne serchas lo neparserchebla...

Sur nia tero (ne tam bela kam ni volas)
Mi despacas kun nia vicini
Ni falias komprenar nia proximi
Ni dessorgas nia domeni
Nam ni sorgas destruktar ti di altri.

En nia domo l' infanti questionas
Pri l' aferi nerespondota
Nam ni la respondo ne savas
O - savante ol - ne aplikas.

Do (do ?) ni fugas
Ad explori dil kosmospaco
Celante nia struchala kapi
En la sabli di Marso...

Nikolay Gaponenko

Nikolay Gaponenko esis sovyeta civitano, ukrainiano, ed habitis en Kiev. Pri ilu ni savas poke: regretinde tro ofte inquesto-letri pri biografio restas ulube... nerespondizata. Ni savas nur ke il partoprenis al liberigiva milito kontre la naziista armeo, e ke il mortis kelka yari ante nun.

Por ke vivon tu pasus ne vane...

Savis me un homo en Armeo,
Lu repozas nun en tomb' areo:
Ma Lu kurajoze en kombati
Defensabis mult popul-gefrati.
 Ilu mortis mez nombroza mortis,
 Tala esis Lua fina vorti:

Por ke vivon Tu pasus ne vane –
Ne disipez Tu forci. dil kord' !
Ne stagneskez -
 ma sempr' adavane !

Por la homi vivar - to es joyo,
Meze voyi nombroz - ca es voyo
Apertanta a bel vivo-pord'.

(30.IV.1966, Kiev)

Naskez por krear bel vivo !

Floro naskis sub arboro...
Sun' salutis nasko-horo...
Ciel' ridetis, joyis blua
De senfin altego lua...
 Ornez la homala vivo
 Ho, floreto - joyo nia !
Sub la Luno infanteto
Apareskis... sur Planeto,
Nia kordii rideskas,
Kantas, joyas, felicheskas...
 Kreskez por krear bel vivo,
 Ho, homet' - espero nia !
Ma sub Suno, Luno... - bombi ...
Lansas tondri... mortis... tombi...

Li mortigas la floreti...
Li mortigas l' infanteti...
Saja homi, haltez tanki. !
Haltez krueloza yanki !
Ho, cesigez la horori !
Homi, salvez nasko-hori
En Panama, en Vietnamo...
Pro liber', Frateso, Amo !

Por ke Pac' lumizez Mondo –
Homi kune facez Rondo !
Flori naskez sub arbori !
Sub la Luno - infanteti !
Sun' salutez nasko-hori
Sub la steli e planeti !
Homal kordii rideskez !
Kantez, joyez, feliceskez !
Naskez ! Kreskez ! Esez viva
Nov homet' - Espero nia !

(1.VI.1966, Kiev)

Testamento

Kand' me mortos, vi sepultez
Men en tomb-areo,
Meze di la Stepi larja
En Ukraina mea;

Ke me videz l' agri vasta,
E Dnipro e monti,
Ke me audez sempr' mujanta,
Bruisanta ondi !

Men sepultez e revoltez
Por ruptar opreso;
L' enemika sangon varsez
Pro liberigeso !

En familio homara,
Nova e libera,
Rimemorez me per vorti
Kordial, sincera.

(Poemo skribita da famoza ukrainiana poeto Taras Shevchenko /1814-1861/, ye
1845, e tradukita da Gaponenko en 1966)

Pensi mea, pensi mea...

Pensi mea, pensi mea,
Vi trublighas mento !
Pro quo plenas vi paperon,
Trista e tormanta ?

Pro quo vento ne dispersis
Vi qual step-polveti ?
E chagreno ne dormigis
Vin qual filieti ?

Pensi mea, pensi mea,
Fiii mea, rozi !
Vin me kreis e sorgadis –
Ub' me vin enpozos ?

Irez vi ad Ukraina
Matro-land' unika,
Kom orfani senhemala ! -
Me - perisos hike.

Trovos vi la kord' afabla,
Audos vort' sincera !
Vi vereson ibe prizos,
Ed glorio vera...

Adkarezez Matro mea,
Ukrain' amanta,
Mea filiin senhema,
Kom tua infanto !

(Taras Shevchenko)

Kolombi flugez !

Ho, flugez vi, kolombi kara,
Haltigos vin obstakli nul,
Kunportez tra la monti, mari
Nia salut' ad mond-popul'.

Se venti super Ter' jemeskos,
Ed esos ciel' pro sturm' tondrar,
Del voy' vin sturm' ne deturneskos,
Milan' ne povos vin kaptar !

Por la felice ed libero
Kolombi flugez ad-avan',
Homar' observas grand-espere
Via flugado Pac-vokant !

Vi flugez tra brilant Auroro,
E tra timendo tenebroz,
Advokez mondon a Laboro,
Ad vivo joya e pacoj !

(Famoza kansono sovietala, muziko da I. Dunaevskiy, vorti da M.
Matusovskiy. Tradukita da N.G., 1958)

Michel Bouts

Michel Bouts esis sat recent idisto, qua quik atraktesis dal posibleso versifar en Ido. Il skribis tre bela poemi, qui aparis precipue en Progreso. Ho ve ! Regretinde dum la maxim recenta yari diversa trauri grava e doloroza frapis il. En granda desespere, il livis domo, vilajo, e desaparís, tale ke nia inquesti che la lokala autoritati indikis, ke "il livis la regiono sen lasir la nov adreso". En Bazouges .la Perouse il ne plus vivas. Ube il nun trovesas ?

Manuo mea

M a n u o , dil cerebro tam anteno kam servanto,
Irga qua trezori il deskovras o genitas,
Vane la kreero sen tua helpo pretendas
Maturigar oli per sua nura spirito.
Omno quon l' okulo sive l' orelo konceptas
Per digit-habileso pokope formacesas.
L' intelekto laboras de ta kruda materio,
E yen, jus-naskinta, l' infanto de nia revo.

Ad ula poeto

La trezori-serchemo
Transiras mont' e mari
Perdante sua spensi
Por la viv' o la morto.
Povra durstanto d' oro,
En mezo del dezerti
Persequas il la sonji
Qui duktos il a nulo.

Quante plu kompatinda
Ta qua por rara versi
Ad omna dementesi
Duktas la mento sua !
Ta truver' egarita
Ja klozinta l' okuli
Sur povra flava lauri
Vartos la dormo lasta.

Se tu perdus la Nordo
Tu jacus en kateni
Meze di la perversi:

Ne plendez tua fato,
Ma serchez altra voyo.
Agnoskinta la kulpi
Tu certe trovos venti
Duktont al bon portuo.

Yuneso

Yuneso ! Evo di Deo, virga del temp' e del morto,
Vers portreto dil amo qua modlis tua vizajo,
Ka falchesar o velkadar esos sempre tua fato ?

Beleso di quo l' preco esas gracio nefinita,
Argil' neimitebla, inter qua palmi presinta,
Qua fairo parfaxis tu sen nigrigar tua vangis ?

No, tu ne es mortiva. Ek la ligili dil karno,
Tua spirito transvivas; e. pos la korpo ruinesis,
Tu brilas en l' okuli dil oldo, dolca lumo...

Ho ve !

Tam longe, kam brilos inter mea fingri
Mea vivo sub sun-lumo quale perlo,
Me nule permisos ad ul korvo o merlo
Kontestor ol a me per granda kriadi.

Tro quik evo venos e gracio foriros.
La treno siflante duktos me vers mortor.
Ube haltar, Sinioro ? Ho ve ! Ta agro pasos
E pasis ta floro quan me volis kolior.

Ho vivo ! Ho vojajo jus entraprezita,
Ho cielo velata per dika kurteno...
Yen hike venonta la nigra spozino,
E yen sur la fluvio la barko funesta...

Via quieteson me tro multe prizis,
Bela posdimezi d' autumnio o printempo,
Dei quin la foto mentioza surprizis
Sub la tremetanta lumo dil bosketo.

Kande sangifanta la suno vesperal
Lansas mea revu kontre l' olda muro,
Ho quante me tremas sequar lua kuro

Qua dronus me kun ol en l' ondo occidental !

Ubr ritrovar vi, omni quin me amis,
Kari qui sen adio forfugis en l' ombro ?
Gepatri, spozino, ka vi ya perisis
Dissolvita meze dil imensa nombro ?

Quon esas la vivo ? Pro quo tante jemar ?
Qua povus evitar mem kelke ta probi ?
Enterigo bone remedias la mali
Quin nula mediko fanfaronas flegar.

Nu irez, nu helpenz hedero verdeskor.
Ne kredez tu sola por ta lasta tasko.
Irgu quan depresas la previsto mortor,
Kad il vere darfas proklamesar homo ?

Valdis Sprogis

Valdis Sprogis esis latviana poeto, qua skribis originale en Ido, ed anke multe e talentoze tradukis de latviana literaturo. Pri il ni havas poka informi biografiala: nulu respondis a nia biografiala inquesti.

Mikra donacajo

(dedikita a Boris Aaronov)

Me volas verso donacar a tu,
amiko, quan nulkande me vidabis.
Ma l' amikeso ta es forta, granitatra,
ol vera monumento divenabis.

Ja longa yari pasas, triadek,
la mondo es vidinta mala sturmi,
ma nia letri flugas same kolombatre,
plubeliganta maxim nobla turmi.

Ni granda skopon volas atingar –
nun nia ero esas advenanta.
Omnube Ido sonez vaste, radiatre,
al amikeso omnin advokante.

Ni quale oron volas disdonar, -
ta esas nia ecelanta volo.
Per Ido la homaro povas rinaskar,
del equatoro tll la kolda Polo.

(1958)

A Baltika Maro

Mea kara Baltika Maro,
esez amata da la homaro !
Gardez fortege la Paco dil mondo,
kontre militi bruizez singl ondo !

(1962)

Dedikita ad Erna Vorobyova

Esez joyoza en la nomdio, -
ton ni deziras per Ido-karto !
Esez fortega tua kordio,
qua amas la homaro, grand idej, arto !

(1965)

Nur per sola bela rozo

Nur por sola bela rozo,
tradi - ridi,
me girlandon alta plektis,
tradi - ridi - rallala !

Nur pro sola bel yunino,
tradi - ridi,
me kavalkis longa voyo,
tradi - ridi – rallala !

En vespero emocoza
tradi - ridi,
me komencis la kavalko,
tradi - ridi - rallala !

Kand atingis la vilajo,
tradi - ridi,
elu stacis en la pordo,
tradi - ridi - rallala !

Me manuo ad el donis,
tradi - ridi,
ma ol restis sen acepto,
tradi - ridi - rallala !

(latva popul-kansono "Bij man vienas rozes de!", tradukita da Valdis Sprogis)

Ho, lucieto

Ho, la verda lucieto,
venez kun me ludetar !

Tu en la profunda maro,
me en querka batelet'.

Quik ek-natas lucieto,
kaptas mea bel kronet'.

Ol portesis tra la maro
per la aquo bulifant.

Ol foriris, ibe restis
en la fora mar-bordet'.

En la fora marbordeto,
en korteto fiancal...

(latva populkansoneto, tradukita da V. Sprogis)

La fableto

Per blanka kavaletto
Kavalkadas la fableto.

Tre rapide hastas olu,
laflugilo es de oro.

Kavalkadas e kavalkas,
olu hemo ne posedas.

Til la nova revi finas
Olu quik la hmo livas.

Me tre longe fore esis,
nunitere me lu vidis:

De arjento es hufeti,
blua flori – la brideto.

La duktilo es perloza –
Kavalkadas e ne stagnas,
olu hemo ne posedas.

(poemo da Aspazija, tradukita da Valdis Sprogis)

Valoras

En momenti desespéroza
la manui falas surmenita,
me sentas - es vane sufrar
por tu,
eterne neacesebla,
nulube trovebla,
indiferenta, inerta
homaro.

Quaze kontre monto giganta
mea esforti ruptadas,
quaze en dezerto sabloza
mea pazi e traci sinkadas.
Mea penado sikeskas
quaze aquo de manuo
e mea yuneso foriras.
En pektoro fatigita,
solitara e povra,
la anmo sentas su kolde.
Vane ! Omno es vane !
Ne valoras !

En la profundaji dil vivo,
en fango sufokiganta
apareskas vizajo
di la homaro –
domajita e sangizita.
E men itere kaptas dolori
e fluas lakrimi,
senfine fluas,
e deskoldigas glacio mea.
E la kordio itere es varma e vasta
quale la suno en la printempo.
Me extensas la manui:
Venez che mea kordio
vi, omni, la aplastita e la refuzita !
Me kisas tu,
la domajita e la sangizita,
kara vizajo dil homaro !
Me fidas a tu !
Qua es sinkinta, povas levar su...
Tu, la eterna fonteno
qua forco elevas ad supre, -
me amas tu, homaro !
Prenez mea pulsanta kordio,
prenez mea lakrimi !

Prenez mea esforci !
Me amas tu
quaze matro sua doloroza infanti.
Kun tu me kreskas,
kun tu me grandekas, me sentas –
ne esas vane.
Valoras !

(Poemo dal latva poetino Aspazija /1868-1943/, tradukita da Valdis Sprogis)

Ausma Pormale

Ausma Pormale esas latva civitano, qua skriptis poemi originala *anke* en Ido, La propozata selekto de poemi venas de yari 1964, 1970 e 1972. Plu ampla informi biografiala mankas... ofte letri ne recevas respondo !

(sen titulo)

No, me ne povas ne kantar. kansonu,
quale hirundo ne portar printempo !
Me kantas ofte, quale la hirundo
kun ali en la flugo gracioz...

Ridetez...

La maxim bela vetero en la naturo esas printempo.
Amoro esas la maxlm bela tempo en la vivo homala.
La maxlm tenua kreuro esas mayflori
E me donacas la fasketo a tu...

R i d e t e z
pri la elegiala kaliceti ! ...

(sen titulo)

Vu povas joyar,
kande mea vangi lakrimin
quale flori petalin
varsas,
nam me ploras
de feliceso...

(sen titulo)

Mea dorno volas devancar tua joyo, -
Ne dicez, ke me es kruela, ne dicez.
Mea dorno volas abasar tua kapo, -
Ne dicez, ke me es malica, ne dicez.
Mea dorno es dolca por mea amato,
Mea dorno promocas ton, quan me amas.

Ludo

Verda maro. Blua revii.
Homino che maro sidas.
Verda maro. Blua revii.
Feliceson elu vidas...
Verda maro. Blua revii.
Homino che maro sidas e ridas...

(sen titolo)

Me pensas pri la jorni:
ca esas ja pasinta...
Ma quale ? —
Yes, quala esis ica jorno ?!
E quala esos la jorno di la morgo ?
 Me ne respondos.
 Respondos
 Mea laboro...

Ye l' autuno

Ye l' autuno ni spektas adsur la querki ankore verda
E ni vartas olua ardoso la autunala,
Ma ni ne audas, ke la kruela autuno rideskas:
- He, vu ne pensez, ke sole la querki subisos !
No, ni ne pensas ! Pos autuno esas vintro...
Ni ne pensas, ma savas: printempo - pos la vintro.
Ne tristigez, la querki ! Ni ankore ne mortos, amiki,
Esas bel ardoso, esos bele verdeskar !

Advenez...

Advenez, se tu povas,
che me en la vespero
quale poemo nova
o la vival espero !

Advenez, se tu povas,
tu esas tam tenera
quale la verso nova
o Suno sur la tero...

La poezio

Quale la maxim tenera sono
En mea oreli sonestas tu,
Kande me pensas pri tu, la bono.
Quale la maxim afabla suno
En mea anmo brilestas tu,
Kande me spektas a tu, la bono.
Quale la maxim purea luno
En mea nokthori aparas tu,
Kande me revas pri tu, la bono.

Quale ni nomos ca vivo astrala ?
Quale a vivo astrala ni dankos ?

Poemeto

Ica dio esas blanka...
Ka tu anke ?
Ica nokto esos tenera...
Me... esos Venero.
 Ho, joyo !

Saluto

Me amas tu quale la rozo amas la Suno.
 Saluto al Suno
 ye nia matini.
Aparez a me quale orea luno aparas a nokto.
 Saluto al luno
 ye nia nokthori.
Me amas tu quale reda rozo amas brilanta Suno.
 Saluto al vivo.
Konfidar esas nia amikala devo,
 Mea saluto a tu.
Ka tu anke volas mea revo...
 Aparez a me quale blua nokto dil amoro
 aparas a luno...

Axel Rylander

Axel Rylander esas pensionita elektrikal injeniuro, laborinta en statala e komunala servo. Il nun evas 70 yari. Il interesekis pri Esperanto en 1933, ma trovis Ido plu facila e kun plu internaciona vortaro. Il recevis Diplomo pri Docado en 1935. Hodie il es direktero dil Instituto di Linguo Internaciona en Suedia, qua i.a. docas Ido per korespondo. Il publisas precipue en "Komuniki", organo di Sueda Ido-Federuro. La sequanta poemo ja aparis en "Antologio" (duesma tomo) da Andreas Juste.

Me renkontris tu...

Me renkontris tu somere.
Lejera qual elfo, bela qual rozguto
tu dansis sur la prati.
Ni vagis kune tra boski e birkoforesti.
Tu donis a me de tua yuneso
e tua boko suflis ke tu men amis.

Me renkontris tu autune.
Esis nebulo sur la prati
ed esis la tempo di pluvo.
Ni disputadis, e tu dicis ke ni mustis separar.
Tua voco esis harda,
tua okulo indiferenta.
Tu iris – e me esis sola.

Me renkontris tu vintre
en la grand urbo.
Tu me ne vidis nam tua regardi esis nur por lu.
Ma la varmeges' en mea sango –
L'ardoroza palpitado dil kordio
naracis por me la fablo dil somero.

(1949)

Heidi Neussner

Heidi Neussner (n. 1929 en Berlin) dum multa yari esis un ek la maxim importanta dukteri dil Ido-movado, kun sua spozo, Alfred Neussner, kun qua el mariajesis en 1950. Heidi e Alfred renkontris su dum Esperanto-yunarala renkontro en Berlin. El lernis Ido per sua spozo. Heidi Neussner instigesis poemifar da Andreas Juste en 1980, ye seminario duktata da il, en La Chaux-de-Fonds (Suisia). Til nun aparis du poemkolekturi: "Galimatiaso" (1980). e "Haiku-atra poemi" (2001). Altra poemi publikigesis en Ido-revui.

Nomado

Volunte me esus nomado
sempre sur voyi iranta,
sempre nov-deskovranta.
Me prizas la vasta vagado.

Aceptas me pluvo e suno
kom parti di plena vivo.
Vintre me marchas tra nivo
e tra foliar' dum autuno.

Sempre nova decido
ye omna krucumo dil voyo,
por kuriozeso e joyo
dop omna montet' nova vido.

Ma kande venas vespero,
fineskas la granda vagado,
erektas tendon nomado
irgaloke sur tero.

Aranjas itere sorgeme
instalur' konocata
e familiar' cikondata
su sentas sekure e heme.

Louis Pascau ("Lui Pasko")

« Me naskis yel 17a di marto 1913, en Le Croisic, mikra pesko-portuo, sude di Bretonia (Francia), qua donis a me mar-pasiono. Pos studiado en kolegi de St. Nazaire e St. Brieuc, me navigis ad Accra, chefurbo dil Gana (Afrika), ube me jeris bazaro e joyis konoceskar l' Afrikani. Milito eventis. Kom infantriano minima-ranga, me sendesis ad Hulst (Holando). Mea regimento mustis quik retretar. Kaptite, me sucedante divenis, en Polonia, Germania, Chekoslovakia, Austria... ter-piochagisto, manu-agisto en sukriferio, farmo-servisto, desfangizisto... e maxim nehabila pri omno ! Tandem en Francia, pos ula judiciala studiado, me funcionis kom statala domenisto. Sempre, omnube, me obediis neambicieme *hobio skribachar mikra kozi. Ido revelesis a me da frati Moureaux, erste yel mea 56a yaro, e delore me ludis uzar ta linguo. Yen do ula proburi, sat kurta, por ne tro tedor. Amen ! »

Idisto en Thun (Suisia) - 1975

(Nur kom memorilo, ca naiva fantaziajo dedikesas humite a nia salvintini: Damzelo Bosshard e Siorino Walser, kun gratitudo)

Yen, avan fenestro, en cielo, V i r g i n o,
Quan ul M o n a k u lo surveyas severe,
E suno briligas, ho ve ! senespere,
La nivo kovrant ta damzelo sen fino.

Yen infre A a r e fluante kantanta,
Yen tekti tegula fidel a pasinto,
Yen dolca vespero nun pastelizanta,
Til steli naskanta, ca pinto... ta pinto...

En alta kastelo di T h u n , romanala,
Yarcenti transvivis por nia vizito.
Ma Santa Beatus ne levis su a la
Riskanti en groto ... Fi ! la ne-polito !

Sur lago navigis ni, la temerari,
E til l n t e r l a k e n , ya inter l' azuro
Dil cielo... l' azuro dil aquo. Montari
Violea cirkondis la bel aventuro.

Ed en B e r n , ni vidis stranjaji: la frapi
Ad klosho da viro tot-hora; muliero
Okul-bendizita stacanta sur kapi,
Superb espadiero, ya ma balanciero.

Ni vidis stacar e falar sur quar pedi,
E plumpe dansar ocilante, pregante,
En foso, quar ursi fur-bruna, plump ! e di
Kantono l' emblemi hanch-movis grunante.

Acensis ni uldie, somite di N i e s e n,
Til agli, for nia industrialaji,
Tam alte kam fiera klimeri, ma ni, sen
Penar tam risikoze kam li, nam per kaji.

Ulnokte, tro kurta, me vidis do de dop
La dorsi di turbo, kolor-vestizita
Suisulo lansanta standardo ... hop ed hop !
Hop ! - Hura ! - Hop ! – Hura ! Hop ica ! - Hop ita !

Kolor-vestiziti sufleskis en tubi
Longega ! ... longega ! ... e li modulacis,
Kom voko flugant del abismi al nubi,
Melodio profunda vers ombri qui tacis.

"Ekursi e festi ? - questionis seriozi –
Ka vi ne laboris ? Kad esas serioza ? "
Ba ! joyo ne nocas la linguo. Per proza
Raporto, li traktez serioze Id-kozi.

Amoro vice milito

Amiki, ni juez totsimple la suno !
La luno disradias por omna revemi.
La cielo observas per centi de steli
Ta bulo tam mikra kam pomo: la tero.

Potento, quon es tu en ca universo ?
Glorioza formiko. E por quo, humili
Sennombra, donante ganante sufregi,
Vi kuras blindatre, klamante, ad morto ?

Askoltez poeti kantanta lo bela.
Vivigez la penso dil saji serena.
E sempre pri singla instanto, nu ! joyez.

En lasta bosketi restanta caglobe,
Gdyuni, mem de antipodi, advenez
Luktar, ne pro odio, ma nur amoroze.

La polutita muevego

Puerulo tre dulce visheskis muevego.
Il dulce, tre dulce, netigis un alo.
Aparas la plumi, ma kelke krumplita.
Nam esas l' ucelo ve ! nek obsidiana,
Nek arte skultit ek ebeno, ma karna,
Vivanta, sufranta, tremanta. La puero
klameskas tre fiere: "Nu ! videz ja l' alo !"
Il takis, nam lore il sentis l' ucelo
Viskoz moleskar e tensar la du gambi,
la kapo pendar, e klozar su l' okuli.
Ne plus la muevego glit-flugos super ni,
ne plus delektesos vidar oceano,
tektaro, foliaro, agraro, fluviaro
pelmele de nun ocilar sub flugado;
ve ! ve ! La muevego nun esas mortinta !

(Sur la plajo sordida, pro naufrajo dil "Amoco-Cadiz", petrol-navo 500.000-tuna)

Pos foliumir olima libro pri homini

Ye la debuto
Di ca yarcento,
Ul moralisto
Ya interdiktis
A la muliero
La bicikl-uzo;
Pro ke – il dicis –
La pedalago
Pedon descelas
E mem ol montras
Parto del suro.
Or, taepoke,
Segun la modo,
Longa la robo
Kovris adinfre
Mem la boteto.
Nia avuli
Juis vidar la
Nur maleoli
Ledro-kovrita.

Ho ! moralisto,
Tu ne konocis
La hominaro.

Tu ne memoris
Eva, qua metis
Nur vito-folio.
Tu ne previdis
Nuna jupeti
E dekolturi,
Nek tu konocis
Sempra viraro,
Qua emoceskus
Pri nur un haro,
Se la cetero
Tote celesus.

(sen titolo)

L' aquo-sprico retrofalas,
desesperant
atingar la cielo.

(sen titolo)

L' akaparemi venas.
For-irez, kapristo,
for-irez kun tua kapri !
Adube fugis l' anmo dil monto ?

(sen titolo)

En la korto dil azilo,
olda navano
delonge ne vidinte maro,
su-inklinante a barelo de pluv-aquo,
longe, longe extazadas...
Ma pri quo, nu ?
Ligno-peceto flotacas...

Komentaro (1980)

Tazio Carlevaro

Kelka yari ante nun, kande Louis Pascau e me expresis ensemble l' opiniono, ke esus oportun editar antologia la libro de moderm Ido-poeti, ni ne previdis, quala desfacilajin ni renkontros. L'unesma (ma precipua) desfacilajo esis la kolektado dil materialo, qua trovesas generale dispersata, manuskripta, o imprimata en mikra revueti kun pok aboneri. Duesma desfacilajo esis la trovo di biografiala dati pri l' autori. Regretinde tro multa letri malgre pretendita korespondemeso restis sen respondo. En ta parto amiko Pascau facis laboro preske superhoma.

Nia skopo esis pruar ke nuntempe l' Ido-poezio ne nur ankore existas, ma ke ol mem florifas. Ton savas poki, mem inter l' Idisti. Ni vizis precipue originala poeti: pro to ni lasis kelke adlatere ta poeti, qui okupis su ekskluzive pri tradukado. La tradukuri, quin vi trovos hike, venas generale de poeti qui plu multe laboris en originalliteratura domeno.

Altra kondiciono dil selekto esis l' aktualeso dil autori. Ni ekskluzis ta poeti, qui segun ni, apartenas a plu frua epoko dil Ido-literaturo, quale Tom Sweetlove, Sigvard Quarfood, Gilbert H. Richardson, Gilbert Vallaeys, Jules Houillon, ed altri plusa.

Finale restis dek autori. Sat richa rekolto, qua tamen ne sempre inkluzas poeti kun sama valoro, o kun sama produktiveso.

Andreas Juste es la chefo dil eskadrono, e probable anke la hodiala Ido-poeto maxim fertila e kun tre profunda konoco (anke tra propra elaboro) dil teknikala moyeni dil Ido-poezio. Segun me, omna futura Ido-poeto ne darfos skriptar sen parstudiir lua verki (ed olti da Louis Pascau e Marcel Bouts). Ta nova poeto mustos sugar quale matralla lakto lua tekniko, e lua generala poetiko. A. Juste komencis sua aktivesado per hero-komika poemo "La serchado", skribita en 1961, ma publisita erste en 1972. Pro to lua unesma verko editita esas "La soneti", kompozita en 1962 e publisita en 1963, qua quik konocigis il al publiko, qua cetere anke quik prizeskis lu. Tre matura "Odo a Couturat" skribita en 1964 e publisita en 1966 fermigis ilua famo, ja existanta. Inter 1972 e 1978 il skribis divers "Epistoli", di qui nur parto aparis koram la publiko, en qui la poeto "rivizitas" poeziale, kun intenci morala e didaktika, problemi sociala, interlingvistika, poetika, lingvistika: ecelanta didaktika poezio.

En 1973 aparis ulteriora verko sapiencala: "La fabli dil olda korvo". Samyare il preparis la manuskripto di varioza verko, kelke komika, kelke serioza, kelke bizara: "Vitra perli". Il ipsa preparis propr antologia la verko "De divers instanti", kun poemi de 1961 til 1974.

"Bunta garbo" propozas la tradukal verki da Juste (1978).

A. Juste, cetere, ne esas nur poeto, ma anke talentoza literaturkritikero, ed exploremo pri l' Ido-kulturo. Tale il kompilis e publikigis l' "Antologio di Idolinguo", homajo a poeti e skripteri idista dil unesma periodo (unesma tomo, 1973), e dil duesma periodo (duesma tomo, 1979), verko kompletigota per triesma tomo.

En 1981 il docis dum un tota semano en kurso pri Ido-kulturo e -literaturo an l' Internaciona Vakancala Skolo di La Chaux-de-Fonds. La texto publikigesos.

Andreas Juste es poeto qua dominacas multa metri e mult strofo-formi, tre atencoza a problemi

di ritmo e di eufonio. Exemple, kun Pascau e Bouts, il introduktis cetere sporade ja uzata evito dil hiati intervortala (ex.: "sua amiko", "sua ordino") , sive per kraza pronunco {"suamiko"} , sive per frazo-transformaco ("ordino sua"). La selekto del poemi da Juste hike prezentata es mikreta parteto de granda produktado.

Prelasta en ca florilegio, tamen nur nam il ipse deziris lo, esas l' altra magna persono dil hodiala Ido-literaturo: Louis Pascau.

Il esas fekunda, humoroza autoro di kurta prozala skisuri, noveleti, quin il cizelas delikate, per linguo vivaca. Il multe tradukis del franca klasika literaturo. Lua verki aparis precipue en "Progreso", ed en "Ido-Letro". Lua poemi pov- esar lirika instanti, ma plu ofte il montras su en reflekti pri spontana inspiruri, ed anke en valoroza, nam humoroza moralfilozofiala verketi, kun imaji a ludiva. Il es anke bona konocanto dil diferanta metrika sistemi, ed il studiis trovar maxim apta transpozis por ta skopo anke a Ido. Regretinde lua verki es tro dispersita en revui e revueti. Segun me. il meritas tota volumo kun kolekturo kompleta de sua verki.

Altra granda voco, ve tro frue silencinta !, en la moderm Ido-poezio es certe Michel Bouts. Il lasis a ni poka verki, ma to poka plasas il quik an alta poeziala nivelo, kun Juste e Pascau, Ta poeto uzas poka rimi, ma rafinite uzas ritmi, qui suportas poezial inspiro kun tre densa semantikala strukturo. Lua temi es la lirika inspiro, l' instanto fuganta, e pro to, ofte, anke profunda medito precize pri ta instanto fuganta, e do pri la senco dil vivo e dil morto.

Del nordo venas Hans Brismark, qua tamen apartenas a generaciono plu anciena kam l' indikit autori (il naskis en 1889). Il lasis ne multa originala verki: probable la poemo hike trovebla es lua maxim bela. Plu konocata il es pro sua tradukuri de Omar Kayyam e de Platon, l' Apologio di Sokrates (1952-3). Preske omna lua verki aparis en "Sueda Mondolingual Revuo".

En la sama periodalo aparis anke sat reguloze la poemi (tradukuri e originalaji) da Axel Rylander, poeto delikata, e certe plu konocata kom tradukero.

Vera nova voco en l' Ido-literaturo prezentesas dal japoniano Kozi Sato, de qua ni proponas kelka japoniana ritmi. Il ne rekte tradukis del japoniana literaturo, ma kreis en Ido segun japoniana ritmi e autori. L' aludema kontenajo dil japonianatra poemi da Kozi Sato bone spozas su kun linguo skematre esencala.

En tal antologio on ne povis karear anke verko dal multe skriptinta Ido-pioniro ukrainiana Boris Aaronov. Il multe tradukis, i.a. populala kansoni e lirika verki da Yevtushenko. Il skriptis anke originale, ma ofte kun tekniko kelke poke rafinita, sen evitar la sufijo-rimi e la duim-rimi (ex.: Kolda / Oldo), quai es cetere la kustumo dil rusa poezio. Regretinde il semblas kelkafoye tro emfazema, kun patoso a ni kelke stranjera, qua tamen es faceto en nia internaciona kaleidoskopo.

Quon ni dicis pri Boris Aaronov es valida anke koncernate Nikolay Gaponenko. Tamen Gaponenko, anke ukrainiano, verkifis plu multe kam Aaronov en literaturo originala en Ido. Malgre teknikala manki, lua tradukuri de Taras Shevchenko esas atencinda. En originala poezio il preferas romantika e patriotika temi, e pro to, ye nia oreli, il es kelke tro bombastika. Polemiko mem tranchiva en poezio es certe posibla, ma la poeziala tekniko mustas lore esar min kruda, e la pensi kelke min emocoza e do plu parlaborita.

Latvia, quale Ukraina, dum multa yari esis bastiono dil Ido-movemento en Uniono Sovietala. Anke en Latvia ne mankis poeti, quale Valdis Sprogis, poeto kun versifo facila, lejera, forsan mem troe, pro ecesiva tendenco al rimifo per suffixi. Lua originala poemi es bone strukturizita, forsan tamen il uzas poka variozo en ritmi. Segun me plu interesiva es lua poemi tradukita, ex. del letona poetino Aspazija, e poemi populala. Il publisis tre poke: quale omn autori de Uniono Sovietala, lua verki cirkulas inter amiki ed estimanti nur en manuskriptala formo.

Il ne restis sen sequanto en Letonia ipsa. Me aludas Ausma Pormale, qua mem superiras il ye teknikala nivelo. Elua poemi es bela florifo poeziala di lirikal inspiro, facita kun libera tekniko, sen tro granda sorgi pri rimi: l' autoro preferas uzar densa e varioza texturo ritmala. Ausma Pormale es tre interesiva voco, qua meritus plu granda konocesado.

Tre modem aspektas la verki da Mirosław Więchowski, poloniano, yuna homo meditoza, kun kontenaji tre humana, qui atraktas ne nur l' atenco, ma anke la kordio. Il uzas libera versi, kun tranquila ma apta e varioza ritmi. Ofte il uzas l' imito per soni tra linguo. To es do poezio qua mustas laute lektesar. Espereble, il duros skriptar en Ido.

Komentaro (2019)

Tazio Carlevaro

Kande, kun Louis Pascau, en kunlaboro kun Andreas Juste, ni decidis prizentar mikra antologieto de Ido-poeti, ni ne imaginis, ke ta laboro esos tante desfacila. Omno trovesis en mikra revueti, o en libri ne facile trovebla. Malgre la fakto, ke ta antologieto koncernas *moderna* Ido-poeti, e ne le antiqua.

Quik pos l' aparo di ca antologieto en 1981, ni konfrontesis kun til lore ne konocata poetino, Heidi Neussner. El apartenas certe al generaciono dil Ido-poeti, quin ni examenis en ta tempo. Tamen, la yari pasis, e ni ne preparis nova edito dil antologieto. Pro diferanta kauzi: la vivo, la laboro, la saneso. Forsan, koncernante me ipsa, anke la pokopa perdo di intereseso por interlinguistikala questioni.

Dum ca yari, eventis anke la regretinda morto di Louis Pascau e di Andreas Juste. Ed anke mea stando ne esas ecelanta. Mea evo montras klare, ke me ne plus esas yuna.

Me do pensis, ke me debas multo ad amba mea mentori di antiqua pasiono. E ke pro to me povas rieditar l' antologieto. Ma kun l' adjunto da poemo da Heidi Nessner, lore ne konocata da ni kom poeto.

Quale standas l' Ido-literaturo e l' Ido-kulturo? Quik pos la preparo dil antologieto, me questionis Andreas Juste pri la destino dil Ido-kulturo, qua a me, lore, semblis deklinar rapide. Il respondis, mencionante sua konfido al futuro. "Sempre, kande on previdis la fino di Ido, l' Ido-mondo ritrovis forteso e kapableso rikomencar. Ido ritrovos nova vivo en l' olda radiki". Me kelke dubitis pri to, ma ni ne diskutis pluse.

En 1998 mortis Andreas Juste. Cadie, Louis Pascau preske obliviesis dal idista mondo. Malgre lua ecelanta kurta noveli.

E tamen, Andreas Juste previdis korekte. Nov autori, nov idei, nova spirito. Ma anke nova maniero difuzar kulturo. Nova kulturala homi, plu interesata al linguo, kam al movemento, plu aktiva en la produktado di kulturo, kam al propago. Li laboras kun moderna maniero konocigar sua laboruri: per formati digitala, ne plus – e certe ne nur – per formati antiqua.

Ica fenomenon deskriptis Gonçalo Neves en ampla e profunda esayi aparinta en du kayeri di *Literatura Foiro*, en qui ni legas pri la renesanco dil Ido-kulturo. Kun altra, nova, forsan stranja, ma interesiva fenomeno. La fakto, ke kelk autori skriptas anke en Esperanto. E forsan anke en altra lingui artificiala¹.

Me esperas, ke la cadiala generaciono dil interesata planlinguisti ulfoye anke preparos antologio.

¹ Gonçalo Neves: *Esperanto kaj Ido. Malsamaj vojoj sur Parnason*. En "Literatura Foiro", N. 293 (junio 2018), p. 153-168, e en N. 294 (aŭgusto 2018), p. 220-230.